



INATSISARTUT

**Aningaasaqarnermut Nunamullu  
Namminermt Naalackersuisoq  
/MAANI**

Ulloq: 30. juni 2013

J.nr.: 01.31.06/13-00631

**Aningaasaqarnermut Akileraartarnermullu Ataatsimiititaliap pingasunngornermi  
ulloq 26. juni 2013-imi aalajangiineranik Naalackersuisunut ilisimatitsineq (suliaq nr.  
01.31.06/13-00631)**

**Ulloq unnuarlu angerlarsimaffimmik nutaamik pilersitsinissamut, missingersuutitut  
sunniuteqanngitsumik ilassutitut aningaasaliissuteqartoqarnissaanik qinnuteqaat**

Naalackersuisut **inassutigaaat**,

- Ilaqutariinnermut Inatsisinillu Atuutitsinermt Naalackersuisoqarfik ulloq unnuarlu angerlarsimaffimmik, sumiginnaasarneq aamma naalungiarsuit attaveqarniarnermikkut ajornartorsiuteqalernissaat pinaveersimatinniarlugit ingerlanneqartussamik ukiumi aningaasanut inatsiseqarfiusumi matumani pilersitsisinnaasoq. Pilersitsinissaq ukiumi aningaasanut inatsiseqarfiusumi 2013-imi kontumut pingaarnermut 30.10.37-mut, Nuna tamakkerlugu meeqqanut inuusuttunullu angerlarsimaffiit, aningaasaliissutaareersut atorlugit pisinnaavoq.

**Aningaasaqarnermut Ataatsimiititaliap oqaaseqaatai**

Konto pingaarnermut 30.10.37-mut, nuna tamakkerlugu meeqqanut inuusuttunullu angerlarsimaffinnut tunngasumut, missingersuutitut ilanngussami aningaasaliinermi tunngavigineqartut allanngortinneqarnissaat Naalackersuisut qinnuteqaatikku kissaatigaat, taamaaliornikkut angajoqqaanut naalungiarsuutilinnut ulloq unnuarlu angerlarsimaffik tassunga ilanngunneqarsinnaaqqullugu.

Qeqertarsuarmi illut uiguleriiaat tallimat iluarsanneqarnermik kingorna ulloq unnuarlu angerlarsimaffittut naleqqutilertussat pissarsiarineqarsimasut suliassamut nassuiaammik kapitali 7-imi paasissutissiissutigineqarpoq. Aamma allassimavoq iluarsaaneq ukiorpat aallartinneqarsinnaassasoq. Angerlarsimaffimmik ingerlatsinermi aningaasatigut kingunerisassat kisimik Aningaasaqarnermt Ataatsimiititaliamut qinnuteqaammik Naalackersuisunit paasissutissiissutigineqarput, taamaattumillu iluarsaaneq aningaasartuutitut aningaasalersuutissat aammalu siunertamut aningaasanut inatsimmi aningaasaliissutitigut sinaakkusiussat iluini ingerlanneqarsinnaanerat pillugit nassuiaat ataatsimiititaliamit qinnutigineqarpoq.

Suliamut piginnaanilinnik sulisussarsinissap ajornartorsiutaanera Aningaasaqarnermt Ataatsimiititaliamit siusinnerusukku eqqumaffigeqquneqarpoq. Kingullermik tamanna pilluni Sisimiuni ulloq unnuarlu angerlarsimaffik isumannaallisagaq pillugu aalajangiinermi (01.31.06/13-622). Qinnuteqaammut matumunnga atatillugu suliassamik nassuiaammik Naalackersuisut paasissutissiissutigaaat angerlarsimaffik ulloq unnuarlu sulisoqassasoq

kiisalu isumaginnittutut ilinniarsimasut minnerpaamik pingasut pisariaqartinneqassasut. Meeqqanut angajoqqaanullu qajassuuttarialinnut angerlarsimaffiit taamaattut piginnaanilinnik sulisoqartinneqarnissaat ataatsimiititaliamit assut pingaartinneqarpoq. Angerlarsimaffimmik taakkuninnga sulisoqarnissaq Naalakkersuisunit qanoq qulakkeerneqalersaarnersoq pillugu nassuiaat itisilerutaasoq ataatsimiititaliamit qinnutigineqarpoq, tassungalu ilanngullugu nassuiarneqarluni Sisimiunut sanilliullugu ilinniarsimasunik piginnaanilinnik Qeqertarsuarmi sulisussarsisinnaanerup ajornannginnerunissaa qanoq Naalakkersuisunit naatsorsuutigineqarnersoq.

### **Aningaasaqarnermut Ataatsimiititaliap aalajangiinera**

Siuliani allassimasutut paasinnilluni aammalu apeqqutit siuliani allassimasut piaartumik akineqarnissaat siunertaralugu Naalakkersuisut inassuteqaataasa isummerfiginissaat Aningaasaqarnermut Ataatsimiititaliamit **kinguartinneqarpoq**.

Naalakkersuisut akissuteqaataata kalaallisut danskisullu kingusinnerpaamik ulloq 31. juli 2013 tiguneqarnissaa ataatsimiititaliamit qinnutigineqarpoq assilineqarneralu uunga nassiuteqquneqarluni: [julie@ina.gl](mailto:julie@ina.gl).

### **Ataatsimiititaliap sinnerlugu**

Finn Karlsen  
Ataatsimiititaliap siulittaasua